



REPUBLIKA E SHQIPËRISË
KËSHILLI I EMËRIMEVE NË DREJTËSI

VENDIM

Nr. 99, datë 30.07.2019

PËR NDALIMIN E KANDIDIMIT TË Z.GENCI GJONÇAJ NË VENDIN VAKANT
PËR INSPEKTOR I LARTË I DREJTËSISË, SHPALLUR NGA KËSHILLI I
EMËRIMEVE NË DREJTËSI NË DATËN 01.03.2019

Këshilli i Emërimeve në Drejtësi, i përbërë nga:

Ardian Dvorani	- Kryetar
Vitore Tusha	- Zëvendëskryetare
Arta Marku	- Anëtare
Margarita Buhali	- Anëtare/Relatore
Fatjona Memçaj	- Anëtare
Fatri Islamaj	- Anëtar
Eriol Roshi	- Anëtar

Asistuar nga sekretare **Dorina Dula**,

Me praninë e Avokates së Popullit, **znj.Erinda Ballanca**, në cilësinë vëzhguesit të përhershëm të mbledhjeve dhe veprimtarisë së Këshillit të Emërimeve në Drejtësi,

Me praninë e përfaqësuesve të autorizuar të subjekteve të ftuara sipas ligjit për pjesëmarrje, në cilësinë e vëzhguesve, në mbledhjen e Këshillit:

- **z.Bledar Dervishaj**, përfaqësuesi i autorizuar i Presidentit të Republikës,

në mbledhjen e datës **30.07.2019**, mori në shqyrtim çështjen që i përket:

**KANDIDATI PËR
INSPEKTOR I LARTË I DREJTËSISË Z. Genci Gjonçaj**

OBJEKTI:

Urdhërimi i ndalimit të kandidimit të **z.Genci Gjonçaj**, në vendin vakant për Inspektor i Lartë i Drejtësisë, të shpallur nga Këshilli i Emërimeve në Drejtësi në datën **01.03.2019**.

KËSHILLI I EMËRIMEVE NË DREJTËSI

Pasi dëgjoi relatimin e anëtares së Këshillit, **znj. Margarita Buhali**, mendimin e paraqitur nga Avokati i Popullit, znj. Erinda Ballanca, në cilësinë e vëzhgueses së përhershme në mbledhjen dhe veprimtarinë e Këshillit të Emërimeve në Drejtësi, lidhur me mënyrën e procedimit të ndjekur për verifikimin e kandidatit dhe si bisedoi çështjen në tërësi,

VËREN:

I. Rrethanat e çështjes

1. Në zbatim të nenit 147/d të Kushtetutës dhe të nenit 199 dhe 229 të Ligjit nr. 115/2016 “Për organet e qeverisjes së sistemit të drejtësisë”, Këshilli i Emërimeve në Drejtësi, në datën 01.03.2019, ka shpallur hapjen e procedurës së aplikimeve për vendin vakant për Inspektor i Lartë i Drejtësisë.

2. Në përfundim të procedurës së aplikimeve për shprehjen e interesit për kandidim, Këshilli i Emërimeve në Drejtësi ka filluar shqyrtimin e aplikimeve të kandidatëve të shoqëruara me dokumentet e paraqitura prej tyre për përmbushjen e kushteve dhe kriterëve ligjore të përcaktuara në nenin 199 të ligjit nr. 115/2016 “Për organet e qeverisjes së sistemit të drejtësisë”.

3. Ndërmjet kandidatëve që kanë shprehur interesin për plotësimin e këtij vendi vakant për Inspektor i Lartë i Drejtësisë, është edhe z. Genci Gjonçaj.

4. Në zbatim të nenit 147/d dhe 149/d të Kushtetutës dhe të nenit 199, 229, 234 pika 4 dhe 235 e vijues të Ligjit nr. 115/2016 “Për organet e qeverisjes së sistemit të drejtësisë”, si edhe të pikës 98 të aktit nënligjor normativ, Vendimi i Këshillit të Emërimeve në Drejtësi me nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, Këshilli i Emërimeve në Drejtësi, në mbledhjen e zhvilluar në datën 05.04.2019, vendosi fillimin e procedurave të verifikimit, vlerësimit, pikëzimit dhe renditjes të kandidatëve që kanë shprehur interesin për vendin vakant për Inspektor i Lartë i Drejtësisë.

5. Në zbatim të nenit 228 të Ligjit nr. 115/2016 dhe të pikave 5, 27 deri 37 dhe 41 të aktit nënligjor normativ, Vendimit të Këshillit të Emërimeve në Drejtësi nr. 2 datë 15.02.2019 “Për procedurën e shortit të caktimit të relatorëve për pozicionet vakante në çdo institucion”, si edhe të pikës 4 të Vendimit të Këshillit të Emërimeve në Drejtësi nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, në të njëjtën ditë të mbledhjes së zhvilluar në datën 05.04.2019, është realizuar edhe procedura për caktimin me short manual të relatorëve për secilin nga vendet vakante të krijuara në Gjykatën Kushtetuese dhe për Inspektor i Lartë i Drejtësisë.

6. Sipas rezultatit të shortit manual të realizuar nga Këshilli i Emërimeve në Drejtësi, lidhur me zgjedhjen e Inspektorit të Lartë të Drejtësisë, të shpallur nga Këshilli i Emërimeve në Drejtësi në datën 01.03.2019, relatore për ndjekjen e procedurave të verifikimit, vlerësimit, pikëzimit dhe renditjes së kandidaturave, është caktuar anëtarja e Këshillit, znj. Margarita Buhali.

7. Z. Genci Gjonçaj, si njëri ndër kandidatët që ka shprehur interesin për vendin vakant të sipërcituar për Inspektor i Lartë i Drejtësisë, në zbatim të pikës 22 të Vendimit të Këshillit të Emërimeve në Drejtësi me nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, është njoftuar me shkrim për tu paraqitur pranë Këshillit për të vijuar me përmbushjen e procedurave të verifikimit të kandidaturës. Njoftimi me shkrim, i kryer në rrugë elektronike në adresën e deklaruar nga vetë kandidati Genci Gjonçaj, gjendet e administruar në dosjen e kandidatit.

8. Në datën 11.04.2019, kandidati Genci Gjonçaj është paraqitur pranë Këshillit të Emërimeve në Drejtësi dhe është pajisur me formularët e deklaramit dhe autorizimet që duhet të plotësohen për qëllimet e vijimit të procedurës së verifikimit të kandidaturës së tij. Kryerja e kësaj procedure vërtetohet nga nënshkrimi prej vetë kandidatit të Deklaratës përkatëse, e cila gjendet e administruar në dosjen e kandidatit.

9. Në datën 12.04.2019, kandidati Genci Gjonçaj ka depozituar në sekretarinë e Këshillit të Emërimeve në Drejtësi formularë të deklaramit dhe autorizimet përkatëse për qëllimet e vijimit të procedurës së verifikimit të kandidaturës së tij, të cilat gjenden të administruara në dosjen e kandidatit.

10. Për verifikimin e kushteve dhe kriterëve ligjore të kandidimit, lidhur me verifikimin dhe kontrollin e pasurisë, në zbatim të nenit 235 të Ligjit nr. 115/2016, si edhe në zbatim të pikës 60 të Vendimit të Këshillit të Emërimeve në Drejtësi nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, me shkresën nr. 265 prot, datë 19.04.2019, Këshilli i ka dërguar ILDKPKI-së listën e kandidatëve dhe personave të lidhur me ta që i nënshtrohen procedurës së verifikimit të kushteve dhe kriterëve të tjera ligjore të kandidimit sipas Ligjit nr. 8577/2000 dhe Ligjit nr.115/2016.

11. Bashkëlidhur kësaj shkrese drejtuar ILDKPKI-së, ndërmjet të tjerave, është vendosur edhe Deklarata e nënshkruar nga kandidati Genci Gjonçaj, ku tregohet se është pajisur me formularët e deklaramit dhe autorizimet që duhet të plotësohen për qëllimet e procedurës së verifikimit të kandidaturës së tij, si edhe data e nënshkrimit, nga e cila fillojnë të llogariten afatet e përcaktuara nga ligji për përmbushjen e detyrimeve ligjore të kandidatit për procedurën e verifikimit të kandidaturës.

12. Me shkresën nr.2854/4 prot, datë 03.05.2019, ILDKPKI ka informuar Këshillin e Emërimeve në Drejtësi se kandidati Genci Gjonçaj e ka përmbushur detyrimin e përcaktuar nga pika 2 e nenit 235 të Ligjit nr. 115/2016 për të dorëzuar të plotësuar pranë atij institucioni Deklaratën e Pasurisë dhe Interesave Privatë të Kandidatit për Pozicione të Ndryshme në Institucionet e Sistemit të Drejtësisë.

13. ILDKPKI, në zbatim të nenit 235 të ligjit nr.115.2015, të ligjit nr. 9049/2003 dhe ligjit nr. 9367/2005, me shkresën nr. 12/28 prot., datë 30.05.2019, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidatin Genci Gjonçaj dhe personat e lidhur me të.

14. Gjithashtu, në funksion të ushtrimit të kompetencave të tij për verifikimin e plotësimit të kushteve dhe kriterëve ligjore të kandidimit, për sa i përket kontrollit të pasurisë, në zbatim të pikës 4 të nenit 229 dhe 235 të ligjit nr. 115/2016, të shkronjës “e” të pikës 20, 24, shkronjës “b” të pikës 60 e vijues të Vendimit të Këshillit të Emërimeve në Drejtësi nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, edhe ky Këshill ka kryer veprimet verifikuese të kërimit nga subjekte publike dhe private, të të dhënave mbi pasuritë, interesat private dhe detyrimet financiare që ekzistojnë në emër dhe për llogari të kandidatit Genci Gjonçaj dhe personave të lidhur me të.

15. Për realizimin e veprimeve verifikuese të lidhura me kontrollin e pasurisë së kandidatit Genci Gjonçaj, Këshilli i Emërimeve në Drejtësi, në datën 17.04.2019, i është drejtuar me kërkesa për informacion institucioneve publike dhe subjekteve private (të cilat janë administruar në dosjen e kandidates), si më poshtë:

- a) Institucioneve bankare: (1) Banka Alpha Albania, (2) Banka Amerikane e Investimeve, (3) Banka Credins, (4) Banka e Bashkuar e Shqipërisë, (5) Banka e Kreditit e Shqipërisë, (6) Banka e Parë e Investimeve, (7) Banka Intesa Sanpaolo, (8) Banka Kombëtare Tregtare, (9) Banka Ndërkombëtare Tregtare, (10) Banka Procredit, (11) Banka Raiffeisen, (12) Banka Societe Generale, (13) Banka Tirana dhe (14) Banka Union.
- b) Institucioneve financiare të licencuara nga Banka e Shqipërisë : (1) Ak-Invest, (2) Albania Leasing, (3) Capital Invest, (4) Easypay sh.p.k. (5) Final sha, (6) Fondi Besa, (7) Iutecredit Albania, (8) Landeslease, (9) M – Pay sh.p.k. (10) NOA sha, (11) Porsche Leasing, (12) Posta Shqiptare, (13) Raiffeisen Leasing, (14) Shoqëria e Parë Financiare e Zhvillimit – FAF, (15) Tirana Factoring & Lease, (16) Tranzit sha, (17) Union Financiar Tiranë.
- c) Subjekteve financiare të licencuar nga AMF : (1) Fondi i Pensionit Vullnetar Credins Pension, (2) Fondi i Investimit Credins Premium, (3) Fondi i Investimit Raiffeisen Invest Euro, (4) Fondi i Investimit Raiffeisen Prestigj, (5) Fondi i Investimit Raiffeisen Vision, (6) Fondi i Investimit ËVP Top Invest, (7) Fondi i Pensionit Vullnetar Raiffeisen, (8) Fondi i Pensionit Vullnetar Sigal.
- ç) Institucione të tjera publike si : (1) Agjencia Shtetërore e Kadastrës, (2) DPSHTRR, (3) D.P.Tatimeve, (4) M.Drejtësisë, (5) OSHEE, (6) QKB, (7) UKT.

16. Në përgjigje të kërkesave për informacion të Këshillit të Emërimeve në Drejtësi, të gjitha institucionet publike dhe subjektet private të treguara në pikën 15 më sipër, kanë dërguar pranë Këshillit përgjigjet përkatëse ku përmbahen të gjitha të dhënat e kërkuara mbi pasuritë e kandidatëve, nëse kanë pasur të tilla për secilin prej tyre, përfshirë edhe kandidatit Genci Gjonçaj.

17. Për verifikimin e kushteve dhe kriterëve ligjore të kandidimit, lidhur me verifikimin dhe kontrollin e integritetit, në zbatim të nenit 236 të Ligjit nr. 115/2016, si edhe në zbatim të pikës 82 të Vendimit të Këshillit të Emërimeve në Drejtësi nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, me shkresën nr. 111 prot, datë 17.04.2019, Këshilli ka dërguar në Prokurorinë e Përgjithshme për kompetencë formularin e vetëdeklarimit të plotësuar sipas ligjit nr. 138/2015 nga kandidati Genci Gjonçaj.

18. Prokuroria e Përgjithshme, me shkresën nr. 1123/67 prot., datë 03.05.2019, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidatin Genci Gjonçaj.

19. Për verifikimin e kushteve dhe kritereve ligjore të kandidimit, lidhur me verifikimin dhe kontrollin e integritetit të kandidatit Genci Gjonçaj, në zbatim të nenit 236 të Ligjit nr. 115/2016, si edhe në zbatim të pikës 84 të Vendimit të Këshillit të Emërimeve në Drejtësi nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, Këshilli i është drejtuar më kërkesë për informacion Drejtorisë së Sigurisë së Informacionit të Klasifikuar (*shkresa nr. 121 prot, datë 17.04.2019*), Shërbimit Informativ të Shtetit (*shkresa nr. 115 prot, datë 17.04.2019*), Agjencisë së Inteligjencës dhe Sigurisë së Mbrojtjes (*shkresa nr. 119 prot, datë 17.04.2019*) dhe Shërbimit për Çështjet e Brendshme dhe Ankesat pranë Ministrisë së Brendshme (*shkresa nr. 116 prot, datë 17.04.2019*).

20. Gjithashtu, Këshilli i Emërimeve në Drejtësi, në vijim të procedurës së sipërcituar në pikën 19 për verifikimin e integritetit, me shkresën nr.352 prot., datë 20.05.2019, i është drejtuar Drejtorisë së Sigurisë së Informacionit të Klasifikuar me kërkesë për ndihmë administrative për përpunimin e informacionit të klasifikuar për qëllimet e verifikimit të integritetit të kandidatëve.

21. Drejtorja e Sigurisë së Informacionit të Klasifikuar dhe Shërbimi për Çështjet e Brendshme dhe Ankesat pranë Ministrisë së Brendshme kanë dërguar përgjigjet e tyre, përkatësisht me shkresat *nr.1545 prot., datë 10.06.2019* dhe *nr. 730/1 prot., datë 20.05.2019*.

22. Në vijim të procedurave të verifikimit dhe kontrollit të integritetit, në zbatim të nenit 229 dhe 236 të Ligjit nr. 115/2016, të dispozitave të ligjit nr. 45/2015, si edhe në zbatim të pikës 85 të Vendimit të Këshillit të Emërimeve në Drejtësi nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, me shkresën nr. 113 prot, datë 17.04.2019, Këshilli ka dërguar formularin e aplikimit përkatës të plotësuar sipas ligjit nr. 45/2015 nga kandidati Genci Gjonçaj për kompetencë dhe shqyrtim pranë Autoritetit për Informimin mbi Dokumentet e Ish-Sigurimit të Shtetit.

23. Autoriteti për Informimin mbi Dokumentet e Ish-Sigurimit të Shtetit, me shkresën nr. 550/4 prot., datë 03.05.2019, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidatin Genci Gjonçaj.

24. Për verifikimin e kushteve dhe kritereve ligjore të kandidimit, në zbatim të nenit 237 dhe 240 të Ligjit nr. 115/2016, si edhe në zbatim të pikave 91-93 të Vendimit të Këshillit të Emërimeve në Drejtësi nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, Këshilli ka marrë në shqyrtim dokumentacionin përkatës të depozituar nga vetë kandidati Genci Gjonçaj në momentin e kandidimit pranë organit të emërtesës që ka shpallur vendin vakant.

25. Lidhur me kushtin e kandidimit të parashikuar nga pika 3 e nenit 147/d të Kushtetutës dhe shkronja “dh” e pikës 1 të nenit 199 të ligjit nr. 115/2016, pra që kandidati *të mos ketë mbajtur pozicione drejtuese në parti politike gjatë 10 viteve të fundit përpara kandidimit*,

Këshilli në datën 02.05.2019 i është drejtuar më kërkesë për informacion partive politike, si dhe Komisionit Qendror të Zgjedhjeve (*shkresa nr. 270 prot., datë 19.04.2019*), duke i bashkëlidhur listat e të gjithë kandidatëve për gjyqtar në Gjykatën Kushtetuese dhe për Inspektor i Lartë të Drejtësisë. Në përgjigje të këtyre kërkesave, KQZ dhe parti politike kanë dërguar informacione lidhur me ekzistencën ose jo të të dhënave që do të vërtetonin angazhimin në ndonjë pozicion drejtues në parti politike të secilit prej kandidatëve, përfshirë edhe kandidatin Genci Gjonçaj.

26. Këshilli i ka kërkuar kandidatin Genci Gjonçaj që në zbatim të shkronjës “d” dhe “dh” të nenit 199 të ligjit nr. 115/2016 “*Për Organet e Qeverisjes së Sistemit të Drejtësisë*” të paraqesë dokumente shtesë zyrtare për të vërtetuar që *nuk është pushuar nga puna më parë për shkaqe disiplinore dhe nuk ka masë disiplinore në fuqi në momentin e kandidimit* si dhe deklarim që *nuk ka mbajtur funksione politike në administratën publike ose pozicione drejtuese në parti politike gjatë 10 vjetëve të fundit përpara kandidimit*.

27. Në datën 19.04.2019, kandidati Genci Gjonçaj ka paraqitur si dokumentacion shtesë vërtetim nr. 3398 prot, datë 19.04.2019 të lëshuar nga Ministria e Brendshme dhe një deklaratë të datës 19.04.2019 të vetë kandidatis se nuk ka mbajtur pozicione drejtuese dhe funksione politike.

28. Nga ana e anëtares së Këshillit, relatore e çështjes, në datë 26.07.2019 i është kërkuar shpjegim kandidatis, se duke mbajtur në konsideratë kriteret ligjore të nenit 199 të ligji nr.115/2016 ju kërkohet të jepni mendimin tuaj për pozicionin e anëtarit të Asamblesë Kombëtare të Partisë Socialiste?

29. Në datë 28.07.2019, kandidati Genci Gjonçaj ka paraqitur pretendimet dhe qëndrimin e tij, lidhur me shpjegimet e kërkuara në rrugë elektronike në datën 26.07.2019.

30. Gjithashtu, për këtë rast kandidimi, Këshilli vlerësoi ti drejtohet me kërkesa për informacion Departamentit të Administratës Publike (*shkresa nr. 274 prot, datë 19.04.2019*), për të paraqitur të dhëna lidhur me kandidatin Genci Gjonçaj në ushtrimin e detyrave dhe veprimtarinë profesionale të tij.

31. Lidhur me të dhënat e kërkuara, Këshilli ka marrë përgjigje me shkrim nga Departamenti i Administratës Publike me *shkresën nr. 2339/1 prot, datë 25.04.2019*.

32. Në përfundim të veprimeve dhe procedurave të kontrollit dhe verifikimit, në zbatim të neneve 235, 236 dhe 237 të ligjit nr. 115/2016, si edhe të Vendimit nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, duke vlerësuar paraprakisht se *ka të dhëna dhe gjetje që mund të sjellin ndalimin e kandidimit*, anëtarja relatore e Këshillit, z. Margarita Buhali ka proceduar me përgatitjen e relacionit përkatës mbi gjendjen e faktit dhe të ligjit të zbatueshëm dhe e ka dërguar çështjen për shqyrtim në mbledhjen e Këshillit.

33. Në zbatim të pikës 33 të Vendimit të Këshillit të Emërimeve në Drejtësi nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, Kryetari ka thirrur mbledhjen e Këshillit duke njoftuar anëtarët për zhvillimin e saj në datën 30.07.2019, rendin e ditës, si edhe duke i bashkëlidhur njoftimit materialet e çështjes. Në rendin e ditës është përfshirë

edhe çështja me objekt urdhërimin e ndalimit të kandidimit të z. Genci Gjonçaj, për vendin vakant për Inspektor i Lartë i Drejtësisë, të shpallur nga Këshilli i Emërimeve në Drejtësi në datën 01.03.2019.

34. Në zbatim të pikës 34 të Vendimit të Këshillit të Emërimeve në Drejtësi nr. 4 datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, dita dhe koha e zhvillimit të mbledhjes, së bashku me relacionin e përgatitur nga relatori, i është njoftuar kandidatit Genci Gjonçaj.

35. I njëjti njoftim, së bashku me dokumentacionin e përgatitur nga relatori mbi veprimet e kryera gjatë procedurës së verifikimit, si edhe materiale të çështjes, i janë dërguar edhe Avokatit të Popullit.

36. Për zhvillimin e mbledhjes së Këshillit në datën 30.07.2019, rendin e ditës dhe relacionin e përgatitur janë njoftuar edhe subjektet që sipas ligjit ftohen të marrin pjesë në mbledhjet e Këshillit.

37. Dita dhe koha e zhvillimit të mbledhjes, si edhe rendi i ditës janë njoftuar publikisht edhe në faqen zyrtare të Gjykatës së Lartë, në pjesën e caktuar për Këshillin e Emërimeve në Drejtësi.

38. Në mbledhjen e Këshillit, pas relatimit të parashtruar nga anëtari relator dhe shpjegimeve mbi pyetjet sqaruese të drejtuara nga anëtarët e Këshillit, Këshilli dëgjoi mendimin e Avokatit të Popullit lidhur me mënyrën e procedimit të ndjekur për verifikimin e kandidatit Genci Gjonçaj.

39. Në thelb, Avokati i Popullit, krahas qëndrimit të përgjithshëm se edhe për këtë rast nuk ka pasur nga KED në dispozicion dokumentacionin e plotë, ku bashkëlidhur akteve të procedurës së verifikimit mungojnë edhe një pjesë dokumenteve dhe përgjigjeve të sjella nga institucionet, parashtrroi se nisur nga diskutimet që u bënë në mbledhje, pyetjeve që bëri Avokati i Popullit, si dhe nga shqyrtimi i dosjes në tërësi të kandidatit, por edhe Statutit të Partisë Socialiste, kemi qëndrimin se Asambleja e Partisë Socialiste është një nga organet drejtuese të këtij subjekti politik dhe se anëtarët e këtij organi ushtrojnë të tilla funksione. Për më tepër Asambleja është një organ që jo vetëm shprehimisht përcaktohet si i tillë në Statut por është edhe një organ që kryen drejtimin e partisë midis 2 kongresve në mbledhje të paktën 4 herë në vit. Në analize të të gjitha të dhënave në procedurën e verifikimit dhe të parashikimeve të Statutit të Partisë Socialiste (nenet 6, 35, 41 në tërësi dhe pika 2, 4, 5 në vecanti, dhe 42) mendojmë se kriteri i pavarësisë politike të kandidatit për Inspektor i Lartë i Drejtësisë nuk plotësohet në këtë rast në lidhje me kriterin e mosushtimit të funksioneve drejtuese në parti politike.

II. Vlerësimi i Këshillit të Emërimeve në Drejtësi

40. Këshilli i Emërimeve në Drejtësi, duke u bazuar në dispozitat ligjore dhe ato nënligjore normative të zbatueshme për çështjen në shqyrtim, si edhe në rrethanat e faktit që rezultojnë në aktet që përmban dosja e kandidatit, vlerëson se duhet të procedojë me vendim për ndalimin e kandidimit të kandidatit Genci Gjonçaj për vendin vakant për Inspektor i Lartë i Drejtësisë, të shpallur nga Këshilli i Emërimeve në Drejtësi në datën 01.03.2019.

41. Në pikën 3 të nenit 147/d të Kushtetutës, parashikohet se:

“3. Inspektori i Lartë i Drejtësisë zgjidhet me tri të pestat e të gjithë anëtarëve të Kuvendit, për një periudhë 9-vjeçare, pa të drejtë rizgjedhjeje, nga radhët e juristëve të spikatur me jo më pak se 15 vjet përvojë pune në profesion, me integritet të lartë moral dhe profesional. Ai nuk duhet të ketë mbajtur funksione politike në administratën publike, ose pozicione drejtuese në parti politike gjatë 10 vjetëve të fundit përpara kandidimit.”

42. Në pikën 1 të nenit 199 të Ligjit nr. 115/2016 parashikohet se:

“1. Inspektor i Lartë i Drejtësisë mund të zgjidhet shtetasi shqiptar, që në momentin e kandidimit përmbush këto kushte:

a) të jetë shtetas shqiptar;

b) të ketë përfunduar ciklin e dytë të studimeve universitare për drejtësi me diplomë “Master i shkencave”, ose diplomë të njësuar me të, ose studimet universitare për drejtësi jashtë shtetit dhe të ketë marrë një diplomë të njësuar, sipas rregullave për njësimin e diplomave, të parashikuara me ligj;

c) ka jo më pak se 15 vjet përvojë pune në profesion si jurist;

ç) nuk është dënuar më parë për kryerjen e një vepre penale;

d) nuk është pushuar nga puna më parë për shkaqe disiplinore dhe nuk ka masë disiplinore në fuqi në momentin e kandidimit;

dh) nuk ka mbajtur funksione politike në administratën publike ose pozicione drejtuese në parti politike gjatë 10 vjetëve të fundit përpara kandidimit;

e) nuk ka qenë anëtar, bashkëpunëtor ose i favorizuar të ish-Sigurimit të Shtetit para 2 korrikut 1991 në kuptimin e ligjit “Për të drejtën e informimit për dokumentet e ish-Sigurimit të Shtetit të Republikës Popullore Socialiste të Shqipërisë”.

ë) nuk është bashkëpunëtor, informator ose agjent i shërbimeve të inteligjencës.”.

43. Për sa i përket procedurës së verifikimit të pasurisë, në përfundim të veprimeve të kontrollit të ushtruar në zbatim të nenit 235 të ligjit nr.115/2015, të ligjit nr. 9049/2003 dhe ligjit nr. 9367/2005, ILDKPKI, me shkresën nr. 12/28 prot., datë 30.05.2019, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidatin Genci Gjonçaj dhe personat e lidhur me të.

44. Në përfundim të analizës së hollësishme financiare të kryer mbi bazën e gjetjeve të siguruara nga informacionet e dërguara nga institucione publike dhe subjekte private, lidhur me deklarin e pasurisë dhe interesave private të kandidatit Genci Gjonçaj, ILDKPKI në raportin e paraqitur ka ardhur në përfundimet se:

a) deklarimi është i saktë në përputhje me ligjin,

b) ka burime financiare të ligjshme për të justifikuar pasurinë,

c) nuk ka kryer fshehje të pasurisë,

ç) nuk ka kryer deklarim të rremë,

e) subjekti nuk gjendet në situatën e konfliktit të interesave.

45. Këshilli i Emërimeve në Drejtësi verifikoi përputhshmërinë e të dhënave të deklaruara nga kandidati Genci Gjonçaj në Deklaratën e Pasurisë dhe Interesave Privatë të Kandidatit për Pozicione të Ndryshme në Institucionet e Sistemit të Drejtësisë që ka depozituar pranë ILDKPKI, mbi bazën e të cilave ky institucion ka realizuar analizën financiare dhe ka ardhur

në përfundimet e tij, në raport me të dhënat që rezultojnë nga informacionet e dërguara pranë Këshillit nga institucionet publike dhe private të treguara në pikën 15 të këtij Vendimi.

46. Mbi bazën e verifikimeve të kryera, Këshillit i rezulton se nuk ka gjetje që tregojnë të dhëna të padeklaruara apo mospërputhje të tyre me të dhënat e treguara në deklaratimet e bëra nga kandidati Genci Gjonçaj pranë ILDKPKI me *Deklaratën e Pasurisë dhe Interesave Privatë të Kandidatit për Pozicione të Ndryshme në Institucionet e Sistemit të Drejtësisë*.

47. Gjithashtu, Këshilli e vlerësoi të plotë dhe ezaurues, sipas kërkesave të legjislacionit në fuqi, hetimin e thelluar dhe analizat e hollësishme financiare të realizuara nga ILDKPKI, sikurse edhe përfundimet e këtij institucioni mbi kontrollin e pasurisë dhe interesave private të kandidatit Genci Gjonçaj.

48. Për këto arsye, në zbatim të nenit 235 të ligjit nr. 115/2016, Këshilli vjen në përfundimin se kandidati Genci Gjonçaj ka kaluar me sukses procesin e kontrollit dhe verifikimit të pasurisë së tij personale dhe të familjarëve të tij. Për rrjedhojë, në zbatim të nenit 235 të ligjit nr. 115/2016, ky kandidat nuk rezulton të jetë në kushtet e ndalimit të kandidimit për sa i përket verifikimit të pasurisë.

49. Lidhur me verifikimin dhe kontrollin e integritetit, kandidati Genci Gjonçaj ka dorëzuar në afat formularin e vetëdeklarimit sipas ligjit nr. 138/2015 "*Për garantimin e integritetit të personave që zgjidhen, emërohen ose ushtrojnë funksione publike*", të cilin, Këshilli ia ka përcjellë për verifikim dhe kompetencë sipas ligjit Prokurorisë së Përgjithshme.

50. Prokuroria e Përgjithshme, me shkresën nr. 1123/67 prot., datë 05.05.2019, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidatin Genci Gjonçaj, duke ardhur përfundimet se "*Subjekti deklarues Genci Luan Gjonçaj, kandidat për Inspektor i Lartë i Drejtësisë, nuk përfshihet në përcaktimet e nenit 2 të ligjit nr. 138/2015 "Për garantimin e integritetit të personave që zgjidhen, emërohen ose ushtrojnë funksione publike."*

51. Prandaj, nisur nga rezultatet e kontrollit të ushtruar nga Prokuroria e Përgjithshme sipas ligjit, Këshilli vjen në përfundimin se kandidati Genci Gjonçaj, krahas plotësisimit të saktë të formularit të vetëdeklarimit, përmbush kushtin e parashikuar nga shkronja "ç" e nenit 199 të ligjit nr. 115/2016, pra që kandidati "*ç) nuk është dënuar më parë për kryerjen e një vepre penale;*". Për rrjedhojë, lidhur me këtë kriter, në zbatim të nenit 236 të ligjit nr. 115/2016, ky kandidat nuk rezulton të jetë në kushtet që mund të sjellin ndalimin e kandidimit.

52. Në vijim të procedurave të verifikimit të integritetit, kandidati Genci Gjonçaj ka dorëzuar në afat formularin e aplikimit "*Për informim përpara emërimit/zgjedhjes në poste të larta*" parashikuar në ligjin nr. 45/2015, të cilin, Këshilli ia ka përcjellë për verifikim dhe kompetencë sipas ligjit Autoritetit për Informimin mbi Dokumentet e Ish-Sigurimit të Shtetit.

53. Autoriteti për Informimin mbi Dokumentet e Ish-Sigurimit të Shtetit, me shkresën nr. 550/4 prot., datë 03.05.2019, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidatin Genci Gjonçaj, duke ardhur përfundimin se "*Për zotën Genci Luan Gjonçaj, nga verifikimet e kryera deri tani, nuk figurojnë të ketë materiale, në dokumente të ish-Sigurimit të Shtetit, në emër të tyre, sipas nenit 29, pika 2 të ligjit nr.*

45/2015, "Për të Drejtën e Informimit për Dokumentet e ish-Sigurimit të Shtetit të Republikës Popullore Socialiste të Shqipërisë."

54. Prandaj, nisur nga rezultatet e kontrollit të ushtruar nga Autoriteti për Informimin mbi Dokumentet e Ish-Sigurimit të Shtetit, Këshilli vjen në përfundimin se kandidati Genci Gjonçaj, krahas plotësimit të saktë të formularit përkatës të aplikimit, përmbush kushtet e parashikuara nga ligji nr. 45/2015 për pastërtinë e figurës së funksionarit kushtetues në lidhje me sjelljen dhe veprimtarinë tij përpara datës 2 Korrik 1991. Për rrjedhojë, lidhur me këtë kriter, në zbatim të nenit 236 të ligjit nr. 115/2016, ky kandidat nuk rezulton të jetë në kushtet që mund të sjellin ndalimin e kandidimit.

55. Gjithashtu, Këshilli i Emërimeve në Drejtësi verifikoi, nëpërmjet informacionit të sjellë sipas ligjit nga organe kompetente ligjzbatuese si Drejtoria e Sigurimit të Informacionit të Klasifikuar, Shërbimi Informativ i Shtetit, Agjencia e Inteligjencës dhe Sigurisë së Mbrojtjes dhe Shërbimi i Kontrollit të Çështjeve të Brendshme dhe Ankesave pranë Ministrisë së Brendshme, nëse kandidati Genci Gjonçaj "ka lidhje ose kontakte të papërshtatshme me personat e përfshirë në krimin e organizuar ose me persona të dyshuar të krimit të organizuar". Ky verifikim përbën standardin kushtetues dhe ligjor tashmë të vendosur për figurën dhe integritetin e funksionarëve kushtetues të sistemit të drejtësisë, përpara zgjedhjes dhe gjatë ushtrimit të funksionit, pas ndryshimeve të Kushtetutës në vitin 2016, duke pasur parasysh ato të përcaktuara edhe në nenin DH të Aneksit të Kushtetutës, si edhe në ligjet e tjera të nxjerra në pajtim me të, përfshirë ligjin nr. 84/2016, pra mbi të njëjtat standarde dhe interpretim të këtij kriteri në procesin e rivlerësimit kalimtar të gjyqtarëve dhe prokurorëve.

56. Shërbimi i Kontrollit të Çështjeve të Brendshme dhe Ankesave pranë Ministrisë së Brendshme me shkresën nr. 730/1 prot., datë 20.05.2019, ka përcjellë pranë Këshillit të Emërimeve në Drejtësi informacionin e kërkuar, të cituar në pikën më sipër, nga ku rezulton se, në lidhje me kandidatin Genci Gjonçaj "Nuk figurojnë të evidentuar për veprimtari kriminale."

57. Drejtoria e Sigurimit të Informacionit të Klasifikuar, me shkresën nr.1550 prot., datë 10.06.2019, ka përcjellë pranë Këshillit të Emërimeve në Drejtësi informacionin e përpunuar sipas standardeve ligjore dhe profesionale për këtë kategori informacionesh, të dërguara nga agjencitë ligjzbatuese të cituara në pikën më sipër, nga ku rezulton se "Nuk disponohen materiale implikuese ose kompromentuese për integritetin e figurës së z. Genci Luan Gjonçaj".

58. Këshilli i Emërimeve në Drejtësi, bazuar në njohjen dhe shqyrtimin e informacionit të klasifikuar të dërguar nga agjencitë ligjzbatuese, vjen në përfundimin se, edhe për këtë kriter, në zbatim të nenit 236 të ligjit nr. 115/2016, kandidati Genci Gjonçaj nuk rezulton të jetë në kushtet që mund të sjellin ndalimin e kandidimit.

59. Për verifikimin e kushteve dhe kriterëve të tjera ligjore të kandidimit, në zbatim të shkronjave "b", "d" dhe "dh" të pikës 1, të nenit 199 të ligjit nr. 115/2016, të nenit 237 dhe 240 të Ligjit nr. 115/2016, si edhe në zbatim të pikave 91-93 të Vendimit të Këshillit të Emërimeve në Drejtësi nr. 4 datë 11.03.2019 "Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë", Këshilli shqyrtoi dokumentacionin e depozituar nga vetë kandidati Genci Gjonçaj në momentin e kandidimit pranë organit të emërtesës që ka shpallur vendin vakant, shpjegimet

dhe dokumentet shtesë të paraqitura nga kandidati mbi kërkesën e Këshillit, si edhe përgjigjet nga informacionet e kërkuara nga institucionet publike dhe subjektet private ku kandidati ka ushtruar funksione publike ose veprimtari private profesionale apo ku gjenden të dhëna lidhur me ushtrimin e detyrave dhe veprimtarinë profesionale të tij.

60. Në lidhje me kushtin e kandidimit të parashikuar nga shkronja “b” e pikës 1 të nenit 199 të ligjit nr. 115/2016, pra që kandidati të ketë *përfunduar ciklin e dytë të studimeve universitare për drejtësi me diplomë “Master i shkencave”, ose diplomë të njësuar me të, ose studimet universitare për drejtësi jashtë shtetit dhe të ketë marrë një diplomë të njësuar, sipas rregullave për njësimin e diplomave, të parashikuara me ligj*, nga dokumentacioni i shqyrtuar rezulton se kandidati Genci Gjonçaj ka përfunduar studimet dhe është diplomuar në vitin 1995 si Jurist, në Fakultetin e Drejtësisë të Universitetit të Tiranës. Në zbatim të ligjit nr. 80/2015 *“Për arsimin e lartë dhe kërkimin shkencor në institucionet e arsimit të lartë në Republikën e Shqipërisë”* ky lloj arsimimi kualifikohet si arsim i lartë juridik, Diplomë e Nivelit të Dytë. Për rrjedhojë kandidati Genci Gjonçaj nuk rezulton të jetë në kushtet e ndalimit të kandidimit sipas dispozitave të sipërcituara.

61. Lidhur me kushtin e kandidimit të parashikuar nga pika 3 e nenit 147/d të Kushtetutës dhe shkronja “c” e pikës 1 të nenit 199 të ligjit nr. 115/2016, pra që kandidati të ketë *ka jo më pak se 15 vjet përvojë pune në profesion si jurist*., nga dokumentacioni i shqyrtuar, përfshirë jetëshkrimin, librezën e punës, shkresa e vërtetime të lëshuara nga organet kompetente të emërtesës etj., që janë të administruara në dosjen e kandidatit, ndërmjet të tjerave, rezulton se kandidati Genci Gjonçaj ka ushtruar veprimtari profesionale si:

- a) 1998- në vazhdim Antarësi në Borde publike
- b) 1995 – 1996 Koordinator Projekti Fondacioni Soros, Qendra e Ligjit
- c) 1996 Këshilltar Ligjor Shoqëri Tregtare (Stefi Impex. Sh.p.k.) Tiranë
- ç) 1996 – 1997 Specialist, Drejtoria Mardhënieve me Jashtë Ministria e Transportit, Industrisë dhe Tregëtisë
- d) 1997 – 1998 Drejtor i Drejtorisë Juridike Ministria e Tregëtisë dhe Turizmit
- dh) 1998 – 2002 Drejtor i Drejtorisë Juridike dhe Marrëveshjeve Ministria e Bashkëpunimit Ekonomik dhe Tregëtisë 2002 Drejtor i Drejtorisë Juridike Ministria e Ekonomisë
- e) 2002 – 2007 Sekretar i Përgjithshëm Ministria e Rregullimit të Territorit dhe Turizmit
- ë) 2007- 2013 Pedagog E Drejtë Penale e Përgjithshme, Kriminologji, Penologji, Procedurë civile Universiteti Justiniani I
- f) 2007- 2015 Përfaqësues Ligjor Komisioni Qëndror i Zgjedhjeve
- g) 2011- 2013 Pedagog E Drejtë administrative, Penale e Posacme Universiteti UAT
- gj) 2011-2013 Avokat i qytetit Zyra e Ndihmës Juridike për Qytetarët, Bashkia Tiranë
- h) Shtator 2013- Tetor 2017 Sekretar i Përgjithshëm Ministria e Punëve të Brendshme
- i) Tetor 2017- në vazhdim Sekretar i Përgjithshëm Kuvendi i Shqipërisë

62. Bazuar në gjetjet e cituara në pikën më sipër, Këshilli konstaton se kandidati Genci Gjonçaj ka ushtruar së paku për 15 vjet veprimtari profesionale nga ato të parashikuara si kusht për lejimin e kandidimit nga pika 3 e nenit 147/d të Kushtetutës dhe shkronja “c” e pikës 1 të nenit 199 të ligjit nr. 115/2016.

63. Për sa i përket kushtit të kandidimit të parashikuar nga pika 3 e nenit 147/d të Kushtetutës dhe shkronja “dh” e pikës 1 të nenit 199 të ligjit nr. 115/2016, pra që kandidati *nuk ka*

mbajtur funksione politike në administratën publike ..., sikurse parashtrohet në pikën më sipër, si edhe nga jetëshkrimi dhe aktet e administruara në dosjen e kandidatit për veprimtaritë e tjera të ushtruara, Këshilli konstaton se kandidati Genci Gjonçaj nuk ka ushtruar funksione politike në administratën publike (gjatë 10 viteve të fundit të kandidimit). Për rrjedhojë kandidati Genci Gjonçaj nuk rezulton të jetë në kushtet e ndalimit të kandidimit sipas dispozitave të sipërcituara.

64. Lidhur me kushtin e kandidimit të parashikuar nga pika 3 e nenit 147/d të Kushtetutës dhe shkronja “dh” e pikës 1 të nenit 199 të ligjit nr. 115/2016, pra që kandidati *të mos ketë mbajtur pozicione drejtuese në parti politike gjatë 10 viteve të fundit përpara kandidimit* nga shqyrtimi i jetëshkrimit dhe të dhënave që rezultojnë nga aktet e administruara në dosjen e kandidatit për veprimtaritë e ushtruara prej tij, si edhe shkresat me përgjigje të dërguara nga parti politike sipas kërkesës së Këshillit, Këshilli vëren se kandidati Genci Gjonçaj, në datën 19.04.2019, ka depozituar pranë Këshillit deklaratë ku shprehet se *“nuk kam mbajtur funksione politike në administratës publike ose pozicione drejtuese në parti politike.”*.

65. Nga ana tjetër, sipas shkresës nr. 55/1 prot., datë 07.05.2019 të dërguar nga Partia Socialiste për kandidatin Genci Gjonçaj parashtrohet qëndrimi se: *“nga verifikimi në regjistrin e anëtarësisë së Partisë Socialiste nuk rezulton të ketë qenë dhe të jetë anëtar i PS. Ai ka qenë në cilësinë e përfaqësuesit ligjor të Partisë Socialiste pranë Komisionit Qendror të Zgjedhjeve, nga viti 2007 deri në vitin 2015 sipas përcaktimeve të Kodit Zgjedhor dhe, për këto arsye, ai është zgjedhur anëtar i asamblesë kombëtare të Partisë Socialiste nga vitit 2007 deri në vitin 2013. Sqarohet se bazuar në Statutin dhe rregullat e Partisë Socialiste, anëtari i Asamblesë Kombëtare të saj, nuk është pozicion drejtues në Partinë Socialiste.”*.

66. Në vijim të procedurës së verifikimi për këtë kusht kandidimi, Këshilli i Emërimeve në Drejtësi, i ka kërkuar shpjegim edhe kandidatit Genci Gjonçaj, i cili, në datën 28.07.2019, në rrugë elektronike, ka parashtruar se:

Së pari, nuk kam qenë dhe nuk jam anëtar i subjektit politik PSSH dhe për rrjedhojë, nuk kam dhe nuk mund të kem mbajtur pozicione drejtuese në këtë parti politike.

Së dyti, në priudhën 2007 – 2015 kam ushtruar detyrën e përfaqësuesit ligjor të subjektit politik PSSH në Komisionin Qendror të Zgjedhjeve, sipas përcaktimeve të Kodit Zgjedhor dhe për këtë shkak jam zgjedhur anëtar i Asamblesë Kombëtare të këtij subjekti politik.

Së treti, bazuar në Statutin dhe rregullat e kësaj partie, anëtari i Asamblesë Kombëtare nuk është pozicion drejtues në Partinë Socialiste.

Së katërti, sipas nenit 35 të Statutit të Partisë Socialiste, organet drejtuese dhe përfaqësuese të partisë janë Kongresi, Asambleja Kombëtare, Kryesia, Kryetari.

Në kuptimin e këtij neni, Asambleja Kombëtare është organ përfaqësues i partisë, i cili përbëhet nga anëtarë të zgjedhur nga brenda dhe jashtë partisë. Anëtarë të Asamblesë nga brenda partisë janë anëtarët e zgjedhur nga Kongresi dhe anëtarët e propozuar ex officio. Anëtarë të Asamblesë nga jashtë partisë janë anëtarët e zgjedhur si përfaqësues të sindikatave, shoqatave dhe komuniteteve akademike. Asambleja Kombëtare drejtohet nga Kryetari (sekretari i përgjithshëm i partisë).

Në kuptimin e këtij neni, statusi i anëtarit të Asamblesë Kombëtare nuk mund të vlerësohet as si pozicion drejtues, as si pozicion përfaqësues sepse këtë të fundit (përfaqësues) e ka Asambleja Kombëtare si organ kolegjal.

Së pesti, po sqarohet kuptimin e togfjalëshit “pozicion drejtues”, që rezulton i përdorur nga ligjin nr.115/2016 “Për organet e qeverisjes së sistemit të drejtësisë” në kriteret për

kandidimin dhe përzgjedhjen e anëtarëve të organeve të qeverisjes së sistemit të drejtësisë K.L.G.J, K.L.P apo I.L.D.

- 1- Në nenin 54/3 "Zgjedhja e anëtarit të Këshillit të Lartë Gjyqësor që përfaqëson shoqërinë civile dhe kushtet për t'u zgjedhur" parashikohet si vijon: "Përfaqësuesit nga radhët e organizatave të shoqërisë civile japin dorëheqjen nga çdo pozicion drejtues ose zbatues në këto organizata, nëse zgjidhen anëtarë të Këshillit të Lartë Gjyqësor".
- 2- Në neni 152/3 "Zgjedhja e anëtarit të Këshillit të Lartë të Prokurorisë që përfaqëson shoqërinë civile dhe kushtet për t'u zgjedhur", parashikohet si vijon: "Përfaqësuesit nga radhët e organizatave të shoqërisë civile japin dorëheqjen nga çdo pozicion drejtues ose zbatues në këto organizata, nëse zgjidhen anëtarë të Këshillit të Lartë Prokurorisë".
- 3- Sipas nenit 199/1/dh "Inspektor i Lartë i Drejtësisë mund të zgjidhet shtetasi shqiptar, që në momentin e kandidimit përmbush këto kushte" parashikohet si vijon: "Nuk ka mbajtur funksione politike në administratën publike ose pozicione drejtuese në parti politike gjatë 10 vjetëve të fundit përpara kandidimit".
- 4- Në nenin 200/ç "Papajtueshmëritë Funksioni i Inspektorit të Lartë të Drejtësisë është i papajtueshëm me", parashikohet si vijon: "çdo pozicion drejtues ose anëtarësi në organet drejtuese të organizatave fitimprurëse dhe jofitimprurëse, sindikata ose organizata profesionale dhe çdo organizatë tjetër, me përjashtim të angazhimit në organizata, i cili diktohet për shkak të funksionit".

-Relacioni shoqëruar i ligjit, depozituar në Kuvend, kur ligji ishte në fazën e "Projektligjit" nuk i jep asnjë shpjegim apo sqarim me të detajuar togfjalëshit "pozicion drejtues". Nuk ka një rubrikë të vecantë për këtë qëllim, për përkufizim termash.

- Relacioni i komisionit përgjegjës, gjithashtu, nuk përmban asnjë sqarim apo përkufizim të togfjalëshit "pozicion drejtues".

- Vetë ligji në fjalë nuk përmban një sqarim apo përkufizim të termit.

- Duke qënë kështu, ky term/togfjalësh duhet të marrë kuptimin që njihet përgjithësisht në terminologjinë ligjore, duke e përkufizuar "pozicionin drejtues" si "ushtrimi në mënyrë individuale, në formë dhe në përmbajtje, i të drejtave dhe pushtetit që të jep ligji/kontrata me qëllim drejtimin e veprimtarisë ligjore, politike dhe organizative të institucionit apo subjektit politik, që në rastin tonë është P.S.SH.

67. Këshilli i Emërimeve në Drejtësi pasi analizoi gjetjet në procedurën e verifikimit të kritereve ligjore të kandidimit sipas nenit 199 dhe shpjegimet e dhëna nga kandidati vlerëson se jemi para kushteve të ndalimit të kandidimit pasi kandidati ka mbajtur pozicione drejtuese në parti politike brenda periudhës 10 vjecare nga kandidimi.

68. Sipas shkresës nr.55/1 prot., datë 07.05.2019 të dërguar nga Partia Socialiste për kandidatin Genci Gjonçaj parashtrohet se ky i fundit është zgjedhur anëtar i asamblesë kombëtare të Partisë Socialiste nga viti 2007 deri në vitin 2013. Nga kjo parti politike shpjegohet se zgjedhja e tij është bërë për shkak të faktit se ka qënë përfaqësues i kësaj partie në kolegjin zgjedhor, ndërsa nuk ka qënë anëtar i kësaj partie.

69. Këshilli i Emërimeve në Drejtësi, për të përcaktuar nëse kandidati ka pasur pozicion drejtues në parti politike, shqyrtoi dispozitat e statutit të Partisë Socialiste. Në kreun 6, neni 35 të këtij Statuti, parashikohet se organet drejtuese e përfaqësuese të partisë në nivel

qendror janë Kongresi i partisë, Asambleja Kombëtare e Partisë Socialiste, kryesia e partisë, kryetari i partisë.

70. Ndërsa në nenin 41 të Statutit parashikohet se asambleja përbëhet nga anëtarë të zgjedhur nga kongresi, anëtar që janë në përbërje *ex-officio* (kryetari...etj), anëtarë të zgjedhur si përfaqësues të sindikatave dhe të komuniteteve akademike me afërsi programore me PS. Këta të fundit duhet të jenë deri në 10 % të numrit të përgjithshëm të anëtarëve.

71. Duke iu referuar këtyre përcaktimeve të Statutit, rezultojnë se Asambleja Kombëtare është njëkohësisht organ drejtues i Partisë Socialiste, pasi një gjë e tillë është e parashikuar në mënyrë të shprehur në Statut. Pra neni 35 i Statutit nuk përcakton se asambleja është organ përfaqësues sikurse shpjegon kandidati Genci Gjonçaj, por e konsideron atë si organ drejtues e përfaqësues të partisë.

72. Gjithashtu, KED shqyrtoi edhe kompetencat e këtij organi sipas nenit 42 të Statutit ku ndër të tjera, parashikohet se: *Asambleja organizon e drejton punën, veprimtarinë politike të partisë, organizative, elektorale, propagandistike të partisë, shqyrton e miraton dokumente për qëndrimet politike lidhur me qeverisjen në vend, qeverisjen e situatën ndërkombëtare, miraton programin elektorale të partisë,.....* Nga këto kompetenca rezultojnë se Asambleja Kombëtare e Partisë Socialiste është një organ drejtues i partisë.

73. Po kështu, Asambleja Kombëtare e PS është një organ kolegjal. Anëtarët i asamblesë konsiderohen pjesë përbërëse e këtij organi, i cili, nëpërmjet mendimit të shfaqur dhe votimit bën të mundur marrjen e vendimeve nga asambleja, organ që ka rol organizues dhe drejtues të veprimtarisë politike të partisë.

74. Edhe shpjegimi i kandidatit Genci Gjonçaj se nuk ka qenë anëtar i Partisë Socialiste nuk e diferencon atë nga anëtarët e tjerë të asamblesë kombëtare të kësaj Partie që janë anëtar të saj, për shkak se në Statutin e partisë nuk ekziston ndonjë dispozitë që të përjashtojë këtë kategori anëtarësh nga vendimmarrja e asamblesë kombëtare, duke pasur të njëjtat të drejta dhe detyrime me të zgjedhurit anëtar partie apo *ex officio*.

75. Prandaj KED vlerëson se, në kushtet kur ka qenë anëtar i asamblesë kombëtare të Partisë Socialiste deri në vitin 2013 (pra brenda afatit 10 vjeçar nga kandidimi) dhe çdo anëtar i kësaj asambleje gëzon cilësinë e "pozicionit drejtues në parti" të përcaktuar nga neni 199/dh i ligjit nr.115/2016, kandidati Genci Gjonçaj rezultojnë të jetë në kushtet e ndalimit të kandidimit sipas kësaj dispozite.

76. Në shkronjën "d" të pikës 1 të nenit 199 të ligjit nr. 115/2016, si kusht kandidimi përcaktohet që kandidati *nuk është pushuar nga puna më parë për shkaqe disiplinore dhe nuk ka masë disiplinore në fuqi në momentin e kandidimit*. Nga dokumentacioni i shqyrtuar, përfshirë jetëshkrimin, librezën e punës, shkresa e vërtetime të lëshuara nga organet kompetente të emërtesës etj., që janë të administruara në dosjen e kandidatit, Këshilli konstaton se kandidati Genci Gjonçaj nuk rezultojnë të jetë larguar nga detyra për shkaqe disiplinore. Po kështu, nuk rezultojnë që kandidati të ketë masa disiplinore në fuqi. Për rrjedhojë kandidati Genci Gjonçaj nuk rezultojnë të jetë në kushtet e ndalimit të kandidimit sipas kësaj dispozite.

77. Nisur nga sa analizohet dhe arsyetohet më sipër, bazuar në gjetjet dhe të dhënat e konstatuara gjatë procedurës së verifikimit që rezultojnë nga aktet dhe dokumentacionin që përmban dosja e kandidatit, në interpretim dhe zbatim të ligjit të zbatueshëm për kushtet dhe kriteret e kandidimit për Inspektor i Lartë i Drejtësisë, Këshilli i Emërimeve në Drejtësi vjen në përfundimin se duhet të vendoset ndalimi i kandidimit të kandidatit Genci Gjonçaj në vendin vakant për Inspektor i Lartë i Drejtësisë, të shpallur nga Këshilli i Emërimeve në Drejtësi në datën 01.03.2019.

PËR KËTO ARSYE:

Në mbështetje të pikës 1 të nenit 149/d të Kushtetutës, të pikës 3 të nenit 229 dhe pikës 3 të nenit 237 të Ligjit nr. 115/2016 “Për organet e qeverisjes së sistemit të drejtësisë”, si edhe të shkronjës “b” të pikës 50 dhe 96 të Vendimit të Këshillit të Emërimeve në Drejtësi nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, Këshilli i Emërimeve në Drejtësi

VENDOSI:

1. Ndalimin e kandidimit të kandidatit Genci Gjonçaj, në vendin vakant për Inspektor i Lartë i Drejtësisë, të shpallur nga Këshilli i Emërimeve në Drejtësi në datën 01.03.2019.
2. Në zbatim të nenit 238 të Ligjit nr. 115/2016, ky vendim i njoftohet kandidatit Genci Gjonçaj.
3. Kandidati Genci Gjonçaj ka të drejtën e ankimit në Gjykatën Administrative të Apelit, jo më vonë se 5 ditë nga dita e njoftimit të vendimit të arsyetuar.
4. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.

KRYETARI

Ardian DVORANI

